

जामण

आपणो मेवाड़, आपणी बोली



2020

अपरेल ॐ जून


nirmaan
empowering communities

प्रकाशक-निर्माण सोसायटी-कपासन, चित्तौड़गढ़

गीत (बन्ना सोनिड़ा री गळियाँ निसरिया-2)

बन्ना सोनिड़ा री गळियाँ निसरिया-२

बन्ना कर रया घड़ला रो मोल, बन्नासा थारी बन्नी मंगावे नेवरियाँ-२... ॥

बन्ना दुपट्टा रे पल्ले नेवरियाँ,

बन्ना रीतो रुमाल्यो हाजर किदो, बन्नासा थारी बन्नी मंगावे नेवरियाँ-२... ॥

बन्ना बाणिड़ा री हाटचाँ निसरिया-२,

बन्ना कररिया पडळा रो मोल ओ, बन्नासा थारी बन्नी मंगावे नेवरियाँ-२... ॥

बन्ना दुपट्टा रे पल्ले नेवरियाँ,

बन्ना रीतो रुमाल्यो हाजर किदो, बन्नासा थारी बन्नी मंगावे नेवरियाँ-२... ॥

बन्ना कुमार्या री हाटचाँ निसरिया,

बन्ना कररिया कळस्या रो मोल, बन्नासा थारी बन्नी मंगावे नेवरियाँ-२... ॥

बन्ना दुपट्टा रे पल्ले नेवरियाँ,

बन्ना रीतो रुमाल्यो हाजर किदो, बन्नासा थारी बन्नी मंगावे नेवरियाँ-२... ॥

बन्ना गाजीड़ा री गळियाँ निसरिया,

बन्ना कररिया डोरड़ा रो मोल, बन्नासा थारी बन्नी मंगावे नेवरियाँ-२... ॥

बन्ना दुपट्टा रे पल्ले नेवरियाँ,

बन्ना रीतो रुमाल्यो हाजर किदो, बन्नासा थारी बन्नी मंगावे नेवरियाँ-२... ॥

मेवाड़ी पारश्याँ

1. एक राजा की अनोकी राणी, दुम का गेले पीती पाणी।

– दीवो

2. एक चीज मे देकी जिपे हा दाँत ज्यो बना मुण्डाऊँ बोलन करे मनकाँ ने रसीला।

– हरमुनी

3. एक फुल हे काळा कलर को, माता पे सदा हुआवे। कलड़ा तावड़ा मे वो खुल जावे, छाया मे कमला जावे।

– छतरी

मेवाड़ी कावताँ

1. के तो हुवे राजा को पूत, के हुवे अवदूत।

अर्थ- या तो पैसों वाला ही ठाठ से रहता है या फिर योगी ही ठाठ से रहता है।

2. केणो होरो अन करणो दोरो।

अर्थ- कहना आसान है, करना मुश्किल है।

परदान मंत्री गरीब कल्याण योजना

कोरोना का दुक मूँ निपटबा का बाते भारत सरकार “गरीब कल्याण योजना” की घोसणा 26 मारच 2020 के दन किदी ही, जिऊँ “भारत बंद” की टेम पे कस्यो बी गरीब भूको ने रेवे जरूरत मंदाँ ने फाइदो दे सके। अणिने 1.70 लाक रिप्या को राहत गोसणा किदी ही। सरकार की परदान मंत्री गरीब कल्याण योजना अणी अबकई की गड़ी में मदतगार साबित वी ही। आओ अणी ओजना के बाते ओर जाणा अन अणी ओजना का बाते फारम कस्यान भरे।

Pradhan Mantri Garib Kalyan Yojana (PMGKY): आतमनिर्भर भारत अब्यान में गणी तरे की गोसणा किदी ही, वित मंत्री निरमला सितारमण ने आगला 3 मीना तक बोपार अन सरमिकाँ के बाते ईपीएफ ने जेला ने जारी राकबा का फेसलो किदो अगस्त तक।

परदानमंत्री गरीब कल्याण ओजना में केन्द्र सरकार 80 करोड़ गरीबाँ का बाते आगला तीन मीना तक बोपार्याँ के अन दानक्या के बाते ई पी एफ में रिप्या नाकबा को फेसलो किदो हो।

परदान मंत्री गरीब कल्याण ओजना में केन्द्र सरकार 80 करोड़ गरीबाँ ने आगला तीन 3 मीना तक (मारच, अपरेल, अन मई) तक हर मीने 5 किलो गऊँ कन चाँवळ अन मन छावे जस्यी दाळ फरी में देणी हे। गरीब कल्याण की गोसणा को खास मकसद हे के ज्यो गरीब मनकाँ ने हाताँ में खाबा को अन रिप्या देन वाँकी मदत करणी हे, जिऊँ वाने छावे जतरी कन सामान मोल लेबा में अन जरूरताँ ने पूरी करबा में अबकई ने जेलणी पड़े।

परदान मंत्री गरीब कल्याण ओजना की जाणकारी – भारत सरकार परदान मंत्री गरीब कल्याण ओजना (PMGKY) की सरुआत 2016 में किदी ही, अणी ओजना में सरकार मनकाँ की मनकाँ की बना छुपई तकी इनकम पे जुस्माना हमेत ब्याज चुकाबा को मोको दिदो हो। अणिमें जणिको खुलासो व्यो वणी पे 50 % टेक्स अन जुस्मानो लागी, बाकी 25 % रकम बैंक में जमा वी तकी रेई जणिपे कई ब्याज ने मले।

अणिने अस्यान हमज सकाँ के परदान मंत्री गरीब कल्याण ओजना (PMGKY) में ज्यो बी धन जमा व्यो तको हे वणिपे 30% चारज अन 10% पेलान्टी देणी पड़े। यो जमा वी तकी रकम को लमसम आदो 50% वेई, ईके अलावा गोसणा किदी तकी रकम 20% हिस्सो परदान मंत्री गरीब कल्याण योजना में जमा करणो पड़े अन रुकम को कई ब्याज ने मले अन या रकम च्यार साल तक ने निकळा सके।

वित मंत्री निरमला सितारमण कोरोना राहत में “गरीब कल्याण पेकेज” में :-

– बैंक साखा खोलबा को परावदान

– भवन अन ओरी निर्माण दानक्या के बाते कल्याण कोस में लमसम 3.5 करोड़ पंजिकरत दानक्या हे, अणी ओजना में केन्द्र सरकार राज्याँ ने राहत देबा का बाते 31,000 करोड़ रिप्या का धन ने काम करबा को आदेस दिदो हे।

(PMGKY) ओजना में गरीबाँ ने अन परवास्याँ का बाते रोकड़ा रिप्या देणा।

(PMGKY) (अन्न ओजना) में लमसम 80 करोड़ लोगाँ ने ईको फाइदो देई, ईमें हारानेई पेल्याँ मूँ ज्यो कई बी मलर्यो वेवे, चिंका सवा ओरी 5-5 किलो गऊँ कन चाँवळ मेली। यो वणी मनक पे हे के वो छोका लेई कन गऊँ,

कोरोना की अबकई में परोटीन की भरपई करबा का बाते आगला तीन मीना का बाते हरेक घर में मनकाँ की पसंद की दाळ देई।

- हारई डागडराँ के मेडिकल बीमो

परदान मंतरी बिमा ओजना (PMGKY): किस्त, बीमो, योग्यता अन ईका फाइदा

परदान मंतरी किसान ओजना में किसान ने हर साल 6000 हजार रिप्या मलर्या हे अन अपरेल 2020 में ईकी पेली किस्त 2000 रिप्या सरकार खाता में नाक देई, अंदाज हे के लमसम 8.69 करोड़ करसाणा ने ईमूँ जट फाइदो वेबा की उमीद हे।

सरकार ने उम्मीद हे के रोजगार गारण्टी ओजना के जरिये लमसम 13. 62 करोड़ परिवारों ने फाइदो मेली (PMGKY) में 1 अपरेल 2020 मूँ मिस्टोल की दानकी में 20 रिप्या की बडोतरी केरी। नरेगा में दानकी की रेट हेली वेबाऊँ हरेक दानक्या ने सालाना 2,000 रिप्या को मुनापो मेली।

कुल आट भागाँ में करसाणा ने मिस्टोल, विदवा, गरीब पेंसन वाळा, लूला – पांगळा, जन – धन ओजना में लुगायाँ ने, उज्वळा ओजना में लुगायाँ ने अन वाँका परिवारों ने, आजीविका मिसन, लुगायाँ ने स्वयं सायता समुह, पी. एफ. सरमिक कारड वाळा ने अन खनिज निदी में लाब (DBT) मूँ रोकड़ा रिप्या खाता में नाकी।

- आगला तीन मीना के बाते,

मेवाड़ी खेल तीती

तीती एक खेल को नाम हे। तीती ने फोरा बाळक अन छोर्या खेले। अणी खेल ने बी कतरा बी खेलाड़ी खेल सके। तीती खेलबा वाळा छोरा-छाबरा पेली तो कामटीऊँ कन धूळा में हातऊँ तीती बणावे, मतलब कामटिऊँ लकीर गेंचन जगाँ पे एक मोटो डाबो बणावे। डाबो बणायाँ केड़े वणी डाबा का ऊबा दो भाग करे, वणा दोई भागाँ का पाचा 5 पाँच खाचा बणावे। खाँचा बणायाँ केड़े वणा खाँचा में खेलबा वाळा खेलाड़ी वाँ खाचा में भाटा की कन केलुड़ा की तीती (टग) फेंके। जणी खेलाड़ी की तीती जतरी

भडूला खाँचा में पड़े वो पेली खेले अन वो वी खेलाड़ी को घर वेवे अन वो वणी में जान आपणा घर को हेन्द्याण बणा नाके। पचे वो वणी भाटा की तीती ने लेन वो एक टाँग मू वणी बणी तकी तीती का खाँचा में जावे। ध्यान राकबा की बात या हे के अणी खेल में एक पगऊँ चालणो पड़े अन लकीर पे पग लाग जावे कन दूजो पग जगाँ के अड़ जावे तो बान्ने निकळणो पड़े अन दूजा जणा की बारी आवे अन वो खेले जतरै विंकी बाट नाळणी पड़े वो हारे जटा केड़े पाची बारी आवे अस्यान अणी खेल ने गामाँ में फोरा छोरा-छाबरा अन छोर्या गणी खेले।

सम्पर्क
निर्माण सोसायटी

फ्लेट नं. 4, प्रथम मंजिल, जानकी मोहन कॉम्पलेक्स,
उदयपुर रोड, पाँच बत्ती चौराहा के पास,
कपासन, चित्तौड़गढ़ राजस्थान-312202
फोन नं.-01476-230014

Email- rajasthanlanguages@nirmaan.org.in

Web- www.nirmaan.org.in

बणाबा वाळा:-

रामसिंह चारण, रतन लाल गाडरी अन गोवर्धन जाट

मदत करबा वाळा:-

मुकेश कुमार योगी, रतन लाल योगी अन कविता योगी